

程



瑤草園初集卷之七

讀吳之鯨伯霖甫著

世辨集

武林吳之鯨伯霖甫著

門人葉有聲君實甫校

崇祀督撫甘大中丞祠堂碑

代

噫此督撫甘公祠也公矢忠在社稷殫圖在經
濟靈爽在兩浙功德在萬姓士若民生則瞻戀
歿則悲思祠初建金錢之集響赴至今低回祠
下飲涕躑躅不忍去如公豈易覲哉每讀周禮

大司徒以祀禮教敬則民不易蓋聖人因人心
之弗諼罔知所報不得已而藉展牲告牲帗舞
執歌畫彝蕭縮之儀竭誠獻白要以繫民思者
教民敬故以勞定民禦災捍患爲祀典首重而
公真百世不遷者矣按公諱士介號紫亭豫章
之信豐人也登萬曆丁丑進士兩試繁邑徵臺
史按吳楚畿內掌河南道有赫赫聲尋由大理
撫鳳陽乙巳移鎮兩浙當公之甫下車也卽以

釐奸興利爲已任簡靜仁恕不務苛細視省會
大關窾決意行之不少骫貪婪者立褫爵在位
震栗材官蹶張精試之拔其尤債帥不敢以私
請營兵有月羨八分乾沒主者公悉爲清理給
以宿飽歡聲如雷瀕江素苦盜秋冬尤甚探丸
胠篋走帆檣如駛公調游徼巡邊施號砲嚴賞
罰夜柝無警焉漕糶出納惟時公奏裁監兌歲
省溢費不訾吏畏威民懷惠精彩映發化日如

初集 卷之七
燦而功之最鉅者在戊申稽天之浸舟行入市
枵民待斃而已公條畫萬方蠲逋賑糜遠糴以
平市價移咨以致行商常平不設監吏官米聽
民自鬻每石立減價十之二三而所存活億萬
生靈不啻也公復爲抗疏以災聞至再至三卒
報可留百萬之粟貯發常平武林二百年未有
奇變民賴安全誰之賜歟公雅志真修耻爲口
耳之學初詣勲賢祠諄諄提誨得濼洛正傳繼

復月課有程歲會有紀講學有牌論學有箋俱
務實益尋建虎林書院祀名賢隆儒碩白屋青
衿皆以禮羅致士彬彬嚮化若登孔廡焉更爲
立鄉約申教誡有一夫不納於軌意未慊者而
公尤有深計遠慮貽我浙千百世之福而無一
人知之者內璫魯睥睨浙藩齒移窟鎮守府預
以已銜書棹楔嘗我公聞報漏下二鼓立命窺
去亟易書院額而謀遂寢噫市人知公加惠來

學復講院地仍舊署不擾民居倡發已貲不煩
公帑是足式來襍矣而妙用睿謨潛消無窮之
隱禍此非大臣經緯百世不磨者哉他若嚴宰
牛火葬溺女之戒除賭賽扛幫挾制之奸濬南
湖以肇永利節宴會以汰繁儀種種善政更僕
未易數也至其儉素自甘餐冰茹蘗鞠躬盡瘁
死而後已臨危猶發守汛叮嚀臯比檄助學院
易簣時敝袴已經三浣敗筭不貯一錢天地爲

昭日月共燭蓋以聖賢之操持撫豪傑之抱負
近代罕儷者矣昔襄陽奏祀孔明朝議不合民
分界守祠香火逾盛如南陽阡之改爲原氏阡
人心實有不可強者報功崇德蒸嘗奕世非獨
峴山一淚已也公真未艾已哉敬述大端而系
以銘銘曰匡嶽儲靈姚江紹脉範已惟清經世
伊績和比薰風三公不易迅若驚飈密于貫蟲
深礪孰闌以安反側憐埒滔天由已飢溺步禱

初集 卷之七 四
方祇輸誠自格抗疏承明殫豁衽席倡明正學
良知用揚箕尾乘雲精英耀日俎豆方新千秋

南湖
湖之
不
代
境

南湖告成碑代

武林山水聯麗而胥原止康以成沃壤必繇疏
導先喆經綸至今爲烈其介在錢塘餘杭之中
者名南湖漢熹平陳公渾所開也縱橫一萬三
千七百畝崇岡鬱盤波光耀碧清暉映帶氣候

遞換形勝與西湖埒後漸堙塞唐寶曆歸公珣
重修宋崇寧楊公時復修之而三賢皆載祀典
按志天日諸山之水迸注苕溪分注石門港由
石門港逶迤而入汪汪淼淼滙成巨浸是爲南
湖其下流杭嘉湖三郡受之盖若居亭然瀦積
有區用以緩其澎湃洸瀆之勢不致衝潰難禦
而曠旱時引漑溝塍三郡咸被其澤數百年來
稱東南一大利藪矣歲久防弛濱湖諸豪爲政

方祇輪誠自格抗疏承明殫豁衽席倡明正學
良知用揚箕尾乘雲精英耀日俎豆方新千秋
無斁

南湖告成碑

武林山水聯麗而胥原止康以成沃壤必繇疏
導先喆經綸至今爲烈其介在錢塘餘杭之中
者名南湖漢熹平陳公渾所開也縱橫一萬三
千七百畝崇岡鬱盤波光耀碧清暉映帶氣候

遙換形勝與西湖埒後漸堙塞唐寶曆歸公珣
重修宋崇寧楊公時復修之而三賢皆載祀典
按志天日諸山之水迸注苕溪分注石門港由
石門港逶迤而入汪汪淼淼滙成巨浸是爲南
湖其下流杭嘉湖三郡受之盖若居亭然瀦積
有區用以緩其澎湃洸瀆之勢不致衝潰難禦
而曠旱時引漑溝塍三郡咸被其澤數百年來
稱東南一大利藪矣歲久防弛濱湖諸豪爲政

臚割潢汙封殖益廣至扞三尺不顧弘正間水部臧公朱公皆欲奪以還湖議已定汔無底績至嘉靖初侍御傅公始慨然以清復爲已任然考碑亦僅還湖八千一百六十畝侍御還諸豪割據如初無何併其碑遷之黍稌高廩穠桑茂樹逵軌如鱗臺榭相望而向所稱清復者不可復識矣湖廢則水無所歸淫潦旣苦漫漭一遇亢乾又束手而仰雲漢庚癸之呼憤惋無所控

訴歲戊申杭郡苦久雨連月不休禹杭而下水漂沒廬舍田疇以萬萬計三郡之民日蟻集轅門告災時水利王君往覘狀民之荷簞笠以鏟斧從者千餘人隨車所向一呼而鄧林合抱綺閣連薨應聲俱摧如拉枯朽水勢稍舒衆俱跳號謹舞震山駭谷遂縛豪寘之法而一時共事諸公咸蒿目焦心以興湖爲急務矣不佞奉命撫浙偕兩臺日集所司條便宜郡邑長佐次

第往營蓄泄高下故道及所爲永遠計者旣備
且恣而約費巨萬括諸豪侵牟及三郡贖鍰苦
不給有司議加賦 天子矜憫小民俾無耗累
忝而特 允直指鄭公請捐傳犯侵尅袍服賦
四萬爲修復費 聖主浩蕩之恩加惠浙土百
萬生靈其有瘳乎於是相度湖勢除高田七百
四十畝有奇三分之二以補軍屯一以召民佃
而其他菰蒲禾黍之區無問在官在民盡斥以

爲湖約如傳侍御清復之舊而止其立法也湖
分四隅隅分二十井井分六十畝畝分十區每
區計用夫若干里遞派之每夫計領工食若干
縣令頒之每夫領工食計汰泥若干四隅委官
督之卽用淤泥築十字長堤堤上蒔桑萬株使
湖藉堤以爲固堤藉桑以爲固而桑與田所入
皆官筦之以克五年一小濬十年一大濬之需
庶亦免徵派云堤勢綿亘建橋六所彷彿蘇文忠

公西湖故事龜梁虹渚洄洑漣漪非徒增飾勝
覽皆用調亭注瀉而復於湖堤內設閘二以節
奔湧堤外設壩一以防衝齧四隅各設夫二以
察損壞仍著爲令所在縣官課績一切以湖興
廢爲等差噫法至此亦可謂詳核無遺矣後之
游者睇丹崖溯澄流疑以爲神囂仙的應接不
暇而抑知隆古以來開而塞成而毀荆營屢更
曠舉炳煥豈易有今日哉功旣訖牒上大司農

具疏請大略云南湖貽患城已爲沼民且爲魚
屢極三郡之災奚啻九年之水乃諸臣計畫一
周告成朞月畚鍤雲集有如鬼策神驅庸調不
聞更訝泉金雨粟金堤甃社永奠半壁於東南
石堰高粱歲登千倉於原隰此豈竊息壤以堙
洪水積蘆灰而止驚濤蓋緣軫其咨之念備濟
川之才牖戶綢繆又安方割旣經撫按具題合
移咨吏部記錄以修吏治靖宏圖云 上報可

一時臣工咸用肅欽奉揚休命將載諸貞垠以
彰不朽而不佞敬集在事諸臣拜手颺言曰南
湖之役賴 皇上湛恩賢僚屬寅贊勿替臣預
觀厥成俾利兆民輦方輿與天地無極猗歟休
哉曷亦念茲締造孔艱美成在久彼豪耽耽巧
以中當事者而威箝其下偃僂之及豈在一朝
不虞爲傳侍御之續乎敢告循良以永厥圖方
祇上下實鑒臨之矣敬系以銘銘曰天目肇源

石門剖絡渚以安流震澤爲壑濼濤溢激若擣
戎兵師出以律甲騎雲屯千頃洪浸迺奠厥土
按轡徐行吐納之府岸谷匪夷滄化爲田狐營
其窟寧顧十千大浸稽天衆怒難犯奮臂一呼
誅鋤轉盼旣懲之法濬川決渠聚糧而謀地肺
灌輸 帝曰其咨朕心孔疚煎膏櫟荒孰貽之
咎大慙如蚊嗜民之脂出爾反爾取懷與之畚
甬聿興趼踵煙附馨鼓弗勝汪洋指顧長虹飲

渭繚以文梁揚霄振靄流霞殫芳三郡告寧蘊
崇彰解望舒躍金翔陽逸駭瞻彼靈雨於桑於
田孺膏丹粒綠縟芊眠永思其終有備無患僉
曰是役一舉三善貲逾萬鏹薄歛不浮勞逾萬
趾時使用休事不訾窳碁而功奏保定孔固俾
爾單厚古不云乎維星從風下之視土若金在
鎔柱釁窒瑕綢繆貴蚤不假挈瓶累土師保繩
繩無疆萬姓之福自天申之敢告司牧

重修杭州府儒學碑

代

我國家昌明之化光軒熙堯蔚爲經術黼黻天
地其在今日輿羞短服飾耻危冠鼓翮駕龍韋
帶承塵而學官爲文章禮樂之淵百萬觀瞻於
茲托始維是浙爲首藩杭爲首郡如人之有冠
冕仰止綦重不佞奉命撫浙暨直指鄭公韓
公張公偕爲經畫屬郡邑長督成之三載告竣
閱穆豐華煥若新構諸大夫以下請余一言爲

記夫考成象始以永令圖不佞亦願述其詳詔
之來襁者矣按志武林古臨安郡學宮在通越
門外紹興初徙凌家橋西卽今址至正毀於燹
建復入國朝永樂十七年又燬僅存戟門宣
德初始恢拓其基八年乃成嗣是頻圯頻葺歲
有蕩茨丹艧之名而構榑欹雪磈碗侵霜競爲
文具傳郵耳萬曆丁未郡守王君司理胡君從
藩長王公指酌議鼎新約費九百緡有奇以公

帑告匱未遑也已酉夏不佞顧瞻榱桷亟議從
事因與直指公僉發額羨爲鳩工庀材計而復
時時諭戒之母叢侵牟母飽些窳母炫耳目母
祈速就念務之最大者莫如至聖殿歲月已久
中蠹外剝可僅爲補苴計乎母虞費重虞費而
無益榆葉同枯株也屬署印司理孫君更爲核
實給貲而正殿儼然重建矣玄雲承棟丹虹亘
梁綺井葩楹旣崇且麗而實枚之觀偉矣復采

磚葺堤廣除砥平方臺岫崩鏞鼓樅業祝啟靴
磬舞佾燦設而裸獻之地肅矣郡守王君復爲
葺啓聖祠建坊置柵重建三司廳而明倫堂跋
翼翬飛尊經閣舒蜺振曜學舍祠廡不鏤不繪
德禮之基固矣藩長及郡邑令復建魁星閣以
彪炳元樞助宣弘化而鳴珂帶緹鏘濟肩摩文
明之氣揚矣蓋興工在庚戌二月二十六日至
辛亥十月十六日報完實費鏹一千五百二十

八兩有奇而餘貲尚可置膳田移修萬松書院
則重道崇儒人心所同遂不煩勸贊聿彰勝舉
二百年來所未覩者歟不佞旣與二三大夫樂
觀厥成而大夫以下咸進曰是舉也備三善焉
蠹天排雲之構綈錦輝煌之製遞有作者而獨
於至聖殿費不稱繁役不稱厲愈侈壯麗愈快
輿情國老民宗望而景戴爲效一昔平津建欽
賢翹材以彙儲四方之士爲識者所誦而周璆

下榻於郡署倪寬帶經於學舍雖示禮賢好士
憐才蒐異之心然何隘也所及幾何頃類宮肇
建園橋忤踴下者鼓篋孫業上者擢秀簡奇小
大于邁言笑伊教利何溥而聲何遠乎爲效二
松楠旅楹孔曼且碩貴堅也學宮之葺屢矣不
爲旦夕浮游之求而爲千百年鞏固之計良木
匪樗珉玫象璧一勞永逸考卜用光可久之謂
大業正未有艾爲效三而不佞敬揖諸大夫曰

果如所言則直指公之首倡捐鏹也監司君之
協贊輸餒也擁關水部錢君之濟美助貲也郡
邑令之率作教勤也余不佞何力之有其宣揚
聖澤鼓舞譽髦以共布 聖天子菁莪造士之
化則余不佞有厚望矣是爲記

三衢陳郡丞德政碑代

粵南倣凡陳公奉命佐三衢政敷歷六載百昌
茹潤五邑屬車之塵上自秩庸下建井牧澤俊

田髦留廉士保莫不淪洽玄膏衽席康錫昕夕
籲禱惠我無疆而公屢賦遂初滄洲結念衢人
同聲乞留以暨今日既政績覃旬業兩報最直
指使者庶風登實矜念衆悃因特疏公名爲三
衢請於朝而會晉秩藩相之命已下詔督就道
一時萬姓如孺失哺攀轅無計號呼若狂則咸
聚族而謀曰 聖主在宥率土流恩豈其遐棄
衢而慙遺我公九閭可排閭闔非遠曷羸輶而

扣諸自公之惠茲土也淳心爲質經緯而抒之
仁如挾纊明比觀火覈事不課無稽效必責有
濟濟多士實維詩書禮樂之胤焉公延禮殷至
軫恤都養贖爰所不盡蠲者篆郡付郡宮篆邑
付邑宮廣置學田重飭尊經文昌二閣瞻仰鼓
柝車前雙鹿城上夜烏未足擬公一二也鹽漕
諸務惟公受成簿書填積恢恢游刃剗革弊竇
肅然照膽凡有投驗不惜寸晷水道通濬商賈

灌輸如飛鳥之趨鬱林無不蔭羽吸露引吭宣
驕矣衢郡蹶張之士及世胄子代蠕動易喧公
清戎藉嚴勾稽一切簡便咸用安枕至其晨鈴
夜鐸躬自擐率萑苻積藪發摘都盡戶犬無嗥
路遺不掇數載以來家家知有生人之樂也鉅
筭連鉅徒自豪耳有如我公之神明靜治乎衢
土瘠俗嗇易習苦甘獨負氣多輓性重難解發
睦風氣徃徃有之公先德作型獎進良善弱植

無依一意顧復而斷擊豪胥誅鋤強梗片語冰
清兩造玦判雖沉寃滯犴咄嗟立剖畏志得情
多所平反以及別邑戴盆涕泣請鞫鍊絮呈拙
鼠獄錮巧叔度五袴庾公三伏任棠之拔薤淳
于之脂牽不堪爲我公述也大璫啣憲挺身不
回積誠所感臬音甚食庇護保全爲而不恃公
所覆露我三衢者高於九天深於九淵矣乃公
蕭然清節約已溪刻盂水在屏一錢不選遂至

圖書數卷行李無計國子尼祿入散宗祭廷召
朝衣無副君魚却潤胡威挂縑以公方之寧復
多讓公之實心實政罄竹可紀耶何以當三衢
而失我公明庭甄錄惟求民譽公之德民歌舞
之矣抑衢民懦歟魯國一人尚能頌孔公之枉
潁川數齒猶得展借寇之私有如 帝聽不遠
我儕小人取諸懷而與之顧不肉骨起蘇耶則
三衢之老從大夫之後者辟咩黎穉進父老而

申之說曰程勞計績一時之報也銘功鏤德百
世之勲也陽和不播孰爲吹萬 聖主憐念三
衢以六載畀公恩過渥矣小人之腹未屬饜乎
卽如上採民譽嘉公洪伐異等寵嘉擁大旄而
去於衢何當也盡衢人之欲必若張謁者之十
載不調楊執戟之三世不遷然後可而何以當
我公則盍圖其百世者于是五邑之氓老者幼
者提携者牽扶者肩摩袵接隨衣冠之士藝明

香注澄水空邑爭馳遮留數百里公慰撫再至
不欲休而副墨紀其大槩鐫石以告我五邑士
庶世世知有公并展所以一二圖報公百世者
仁和邑侯行可吳公德政碑
淮南行可吳公以珪璋特達之儀弱冠掄魁登
南宮高第初試爲吏來治仁和而著練精詳機
隱洞照樹膏覃澤令布風靡六載以來周環撫
字剔奸擿伏無不法冽秋霜惠凝冬纊朝夕煦

哺若將終身矣頃以冬官郎就徵車需次待對
將益展公亮采寅恭之大道而邑之士若民傍
皇遮留如失怙恃旣條公所規德政三十款上
撫臺勒石爲令甲巳則臨江之士若民肩摩以
進曰里之苦積盜也白晝跳梁徒無所矣孰使
之狐有牙而不敢以噬貔有爪而不敢以撼者
非侯耶爭爲建祠鑄象里中以志世世毋忘侯
也則通都之士若民帷衽以舞曰邑之戴神君

也噓枯肉骨欣有天矣孰使一人被之而不哀
萬人蒙之而不禘者非侯耶奈何獨臨江之私
有我侯也則鳩工庀具願徙祠于廣遠蓋子來
樂附而雕楣繡案燦然雲錦計期可竣而士若
民復謀一言冀所以世世毋忘侯者則不佞歛
容以起曰有是哉公之德吾邑者深而士民之
感公者篤前此所未覩也夫烟幅之長日計不
足驚擊之治雅化未遑政在養人明訓具列咸

稱順比爲良矣而市多沙蜮埜有青燐何以祈
歲於司牧民可樂成難與慮始復以因循爲便
矣而覆盆罔照沍谷不暘何以望汲於短綆卽
鉦箎以御智訪禽以懲奸自謂威信爲莫逮矣
而隰楚苞稂之嘆澤量若焦雉羅兔爰之嗟寄
命如茵又何以致鷹化爲鳩虎忽成狸而上與
下相應如桴鼓太史公傳循吏代不數人人不
數事而繼以汲鄭明賑粟決渠爲惠民之大政

則信哉作令之難在興利革弊不在用寬約猛
在民被實益不在揚厲虛聲而乃今信吳公之
德我邑果深也公警捷英敏案無留牘恢恢游
刃咄嗟俱理邑以內風寒暑濕感額揚眉民若
無一不可與公言公亦若無一不知者兩造甫
陳片言立剖卽其人陰行善與爲惡於閒居公
且一燭鬚眉而揭肝肺當釐亟予率取諸寄
則近而求儷公者而不得求之前哲公且兼擅

之而邑之士若民安得不感且篤也請得更僕
數之徵額不屬里遞戶給由票庭設四櫃使戶
自封納盡除歇家火耗諸費小民樂輸道無風
逋以至舖行之給價有期召募之差役無擾其
劉平之百姓感德或增貲就賦或減年就役者
乎保伍連坐盜賊屏跡嚴蒐巨憝之在臨江者
翦其羽翼悉捕正刑其虞翊之設令三科承緹
縫裾積寇駭散者乎俗嗜梟廬游閒成性旣生

盜源復起鬪釁公潛緝寘法凜無少貸境內清
肅其王元規十竒之七所謂不敢賭錢怕官知
者乎受詞不差皂甲聽斷不遲寸晷門外如春
門內如秋其牟融之獄無滯囚吏畏民愛者乎
農民募願納者杜里通夙蠹簽審俱親自裁定
舞文袖手其王渙之公察穆如書佐令讀孝經
者乎南北常平倉舊以殷實者民居守便民倉
歲報小甲五名護之積例爲殃公易以農民一

名准抵超叅書手一名課其勤怠良民樂生以
至鹽盜闌入橋柵止督捕人不株連土箸其卓
茂之勞心憂念察民緩急叢弊悉蠲戶戶安枕
者乎鼎新學宮諸費皆出已貲顧募俱給常例
飛閣丹楹曼邁舊觀使絃歌之士展容布武其
殷阜之修學校人復性王阜之集鸞鳥應雅樂
者乎兩預賢圍所拔多名雋遇弟子員以禮有
註誤被斥者採其生平力請於督學復隸黌宮

籍若而人招致境內有道德能砥修者咨其論
議士風翕然嚮往異采流虹蜚英煥景其文翁
之羽翼相如陳蕃之延禮孺子者乎公誠行雲
流水之軼材抑天空海濶之瑰度也公旣兼衆
長以保艾我邑士民而我邑實沐公賜寧帝河
陽之花南國之棠以爲寄咏已耶今第以工曹
徵司空所屬僅營度經緯飭材辨噐一宮一國
之任耳夫宇宙一家象魏表極范金合土海環
山峙玉堂紫宸五服拱衛以公夙負憑衡而悉
攄之當令構榑桷稅盡爲國能丹堊青英悉呈
章綵社稷豐亨豫大之祚從此滋培海以內且
頌公爲大匠而聖明居總章以藉秉均天開
之兆其在於是而仁和實公宇下其毋忘覆露
之士若民世世幸矣

月明禪師塔院碑

臯亭山在武林東北隅烟嵐晴靄供明聖湖遠

眺孤秀可挹古德耆宿徃徃托跡於此而上中
下三塔最著上捨伏虎禪師真藏中下二塔則
真歇清了月明清杲二師滅度處也二師俱左
綿人同嗣法於丹霞淳公宋紹興二十三年丁
卯朔日了呼首座曰吾行矣跏趺俄頃而逝杲
時方作務聞之亦呵呵伏樹而寂兩公生同俗
長同師不殊天親無著而去住無礙又似龐居
士父子竒哉事聞於朝命使臣建捨於桃花塢

卽今處藩以禪室焚誦不廢入國朝厄於兵
燹成化間復建獨下塔在山址樵蘇蹂踐榛莽
迷離幾與丘垤讓卑矣禪師雪峰與徒水輪俱
杭人天性朴誠戒律精肅初遊五臺叅名嶽歸
訪杲公遺蹟慨然有興復志誅茅編屋不墜而
堅入其門新潔莊嚴能斂人志而發皈依瞻仰
之願依山以居者遠邇趣役累黍可積駸駸拓
大而雪峰已化去水輪愈厲苦拮据矢成未竟

之業一以樸誠動人遂復構殿三楹前後廡宇
鱗次繡錯香燈梵花法幢建鼓鐘磬之聲晨夕
達數里而百年來荒虛遂成珠宮琳宇矣徃歲
辛卯余不佞與俞似宗讀書興教寺欽雪峰高
行時過叅訪師一日指侍者曰此初懺皈誠者
也昨日夜叉頭今朝菩薩面夜叉與菩薩只隔
一條線聲音朗徹余聆之恍然心境清沁若有
所會是歲似宗預計偕卽成進士因與臯亭結

久要而余南北分馳遂虛舊遊顧夙企冰輪之
能成師志而構茲勝果也非特法門龍象抑亦
古剎棟樑歟頃左方伯桐城吳公廉其實與銘
不朽而仁和邑侯海上喬公嘉與更新題日月
明禪院以標其額儼然月明杲禪師與山靈並
曜法席之盛當世世傳燈未艾矣不佞因爲述
其詳而系之以銘銘曰曹溪肇源清原分派提
心爲宗在等無在慧筏渡迷金鏡撥礙杲師受

衣空明洞解現示游戲大千同界遺蛻奚存真
性不壞雪峰上首璞中圭外如月紹休堅忍于
邁猊座揚輝紺宮映帶杲師何心成毀真愛以
覺有情功隆挺載名山護持竹香松籟山靈並
不富春天鐘禪院碑上香公嘉興更勝殿曰尺
俶從富春登觀山望江以南峰阜蔚起若有寶
雲卿靄籠護其上詫謂神囂僊的是宜建名刹
爲吉德勝場而余門人周瞿父曰此天鐘山也

有龍潭瀑布之奇不可不遊逡巡未果偶友人
俞似宗作令德化二三兄弟祖送桐君山時風
日晴好余談及天鐘似宗欣然命棹抵岸可半
里平疇懷新藉草喚觴又里許泉出自乳竇滴
瀝堪寫漸上漸窄若鳥道而龍潭噴沫恍十二
珠簾照映青壁寒氣濺人衣帶似宗與余各據
峭石飛大白數斗不忍捨去及登殿暮矣展禮
大士畢卽促登舟寺僧供茗椀不及低回而別

恨未盡此地之勝今年秋在佛石澗中因識桂上人師弟則天鐘住持也亟詢建刹緣始山舊有古天鐘院廢爲榛莽狐豹之區久矣嘉靖間高僧明清戒行精嚴焚修無間寒暑初結茅潭上僅一袈裟地耳忽猛虎夜午蹲其前清語曰若有宿業任爾一餐如來護法當爲指點住處虎連唬數聲若先導者乃得舊基巋然古佛道場也遂移菴於此而歸附者日益衆遠邇雲集

清稍拓地建大士殿設左右長廊香燈法幢燦宵旦有所禱其應如響而於祈子尤有奇驗於是江南北檀信重趼星馳咸稱爲小天竺國而古蹟遂儼若靈山矣其徒如桂孫性美倜儻有志悉心協助禪誦聲振林木爲居民敬禮續置田地山塘約一百三十餘畝用以供十方常住僧有遇飯一餐樹下一宿者流水膳供不絕薰修日進福施日廣而名亦日益振清師之法力

偉哉先後令茲邑者徐公張公嘉其行給匾批
照爲久遠計昕夕祀延聖壽嚴淨毘尼佛日
方升山魑永遁昔慧遠澄心而龍泉立現朗公
撝杖而古像倏新精廬肇衍於三摩鹿苑驟開
於十笏古刹之興實繇人造信非誣也不佞樂
爲宣敷不自知不律之蕪拙矣寺之祖山爲天
鐘而鉢盂山爲對左獅蹲右象伏峰曰觀音曰
慧日曰法雲曰三台曰北極泉之最著者曰龍
潭曰碧雲曰馬跡隱然馬跡現石上曰晶液曰
玉音從山谷洞中出非但皈依禮黃曇卽探竒選
勝安可不拈瓣香一往哉

南山煙霞清修禪寺碑

由南高峰折而西爲煙霞洞洞石岫碧中列羅
漢像甚夥復有類宰官者相傳五代天福間有
西域僧千歲寶掌憇此因結廬精修洞中鏡羅
漢二百五十像造吳越武肅王夢有五百人渡

江而來乞寄住煙霞遂增前數寺由此建蓋草萊初闢磨廡之迹青燐之影稍稍遠矣宋南渡時香火浸盛塔中鐫護法臣僚數百員各留像諱遠近聞風頂禮者無虛日入五國朝稱覺場名刹嘉靖間寺宇頽圯雖探竒訪勝杖屨不乏而寶幢香蓋瞻仰爲虛嗣後或廢或興僧侶郵置卽吳司理及一二士大夫翔緣謀復多不果就而去荒原斷碣碧蘚蒼藤歛蔓交錯過者慘

焉萬曆己亥里人有廣試廣潤者素投禮雲棲大師每贊誘善根亟諭興復佛土兩人遂力請任事礎柱薨柝稍具其材然特覆一簣耳偶徐左監見之請於司禮孫公於是庀材鳩工成以不日而輝煌暎射巖洞劃然改觀矣時演福菴禪僧宏學戒行具足不出山十五年公訪實具香幣延入寺主持梵誦而命廣潤薙髮皈禮焉自此二諦交澄三幡共樹啓入正之平路坦衆

聖之夷塗收慈雲於四空朗慧日於八極法席
浸盛毘黎不彫公之弘施其無艾乎寺左有地
藏殿石佛菴後有舒嘯亭普賢塔象鼻峰蓋披
雲攬勝者俯瞰江湖如在几掌而瞻依琪苑者
投懺昕夕心境俱寂真覺皇之奧區竺峰之窟
宅也且水樂寫清響於堦除石屋踞舊葱於衢
道龍泓虎跑逶迤先後桂叢松杪凌霄碧落之
墟郁乎盛矣寺旣成學之孫濟航復集諸善信

置田聚糗以傳後禩噫斷際銛鉢而棘扉之老
嫗指示無生石頭力作而南臺之負擔不避重
趺豈但人天聚供抑亦律戒修持有所致之者
歟余每游屐歷南阜過群峰輒低徊其間不忍
去復喜名刹之得成偉觀也喜而紀其顛末如
此俾世世主席者無忘作始之難哉是爲序。

歷山書院碑

代

國朝設山東爲省會縮帶宋魏齊魯之區而濟

南國憑負山海則專屬古齊地華不注虎牙傑
立孤峰刺天濯纓鵲山西湖環繞泮渚聚秀鬱
竒稱雄寰寓自昔衿裾禮樂之風彬彬蔚起炙
轂雕龍及宣德杼文之士必推歷下益以詩書
化廣英喆逸興 聖天子棧樸作人久而彌洽
昭融曠朗盛已極矣而省中未有講習絃誦之
所識者僕焉若有所待余不佞奉 命視醜長
蘆歲已酉行部濟上相土審勢選勝拓基捐贖

鏤五百金剏歷山書院逸陌修衢高衡藻井次
第稽功顏其堂曰精一有廊有廡有軒有室曲
折周複約可百間宏敞巨麗華閭若闢每每司
鐸者登堂伊教建鼓初發而戴縱垂纓肩摩揮
汗微言妙義聞所未聞于以剖抉列聖傳心之
奧旣復譽髦肄業其中以廣文二人督之日有
課月有試檮葩播采氣欲冲霄粲粲如列宿落
落如連珠地遂成文藪數年來掇巍科蜚詞苑

者咸由此發聲指可數矣院之西畔卽李于鱗
白雪樓樓臨趵突泉爲七十二泉之冠因引泉
東注滎漾清映更增勝覽地軸通靈多士蠡息
紛披翦鬱顯烝鏘鉉洵曰都哉頃丙辰夏五余
再被 璽書按部齊魯重登此堂則千櫨百拱
崇峨絢耀不殊易昨之於旦也亟斥鍰百緡置
膳田若干晦歲計所入以供書院諸費自今以
後倪寬無擔運之勞車胤有宵膏之助上庠希

驥之彥筆載春濤繩樞隱豹之姿囊盈秋果用
以佐揚 神聖昌熙之祚永錫無疆諸人士當
踴躍于邁矣歷城令某某礮石乞言而余直叙
創始之由亦欲使後之司茲土者窒瑕增美益
廣厲作新勿闌入乾沒者僅存虛額以負余初
念可也

九十翁玉峰鄭先生誄

當先生登年八秩也司勳氏有贈言諸友執之

初集
卷之七
又二十九
辱在孔肩者各徵歌按部爲獻竿之侑積有成
帙矣更十載大歸條然無怛蓋白雲之駕旋反
其真金格之標適符其兆鄴下豈吉士之嘆江
南謝掌夢之哀而孝子之慕無窮先喆之躋有
託遂以命鯨掇詞爲誄夫誄者累其生平埒之
金石者也先生六齡就塾十歲能文弱而橐鞬
筆墨從臺長於旌旗車馬之役壯而授官吳粵
所在著廉能之聲強而翩然掛冠婆娑彩衣修

人倫之樂艾而抱經握槩課帝錫之胤耆而備
毀瘠禮敦白首孝友之規耄而採石供花坐臥
小龕證太上尊生之旨耄而神滿顏酡抗席飛
談蒸蒸然有俠烈丈夫之氣鮐背而自歌自舞
如取如携嘻嘻然有嬰兒食母之態先生之所
不朽者世子孫無斁矣矧丹笥賸有玄珠素書
比於黃石訪羅浮之正脉私淑諸人佩新建之
典刑躬行君子秉竺乾之寶炬登老氏之春臺

以智養恬融三爲一則述媿揚休壽諸百世正
不宜後於徵歌按部者也其辭曰新鄭肇基遠
宗桓武帶礪永寧載在盟府繇汴徙浙誕瑞吳
山長庚入夢奕奕其光伯舉孝廉仲舉文律十
八從征恭醇萬石祿養色喜陟岵可瞻竹林嘔
血逆旅心酸三十授繻參軍東粵尺檄征戎元
首反接茸巖虎攫籌野猿號怒風慄髮寒霰侵
刀架阻間關獻囚幕府飲至加額將軍好武三

事就緒胡遽無年黔敖之粥載道翳桑之莘摩
肩僵而後扶不知其置斗水莫徼枯魚在肆東
道有主錢穀如流白骨我肉黃骸我收梧丘不
寃黎亭無哭京觀峩峩泉臺漠漠偉哉南海水
齧其堤瓠子歌兮禾生耳于思詠兮袂成帷三
日報成爭犒牛酒祝歲慰其豚蹄奠壤怵于馬
首彼其之子黃金滿籬伯起之知可畏若敖之
鬼不歆白日鑒誠清霜表志薦牘雲馳馳旌海

溘斥鹵之濱斲雪波臣之窟漕冰鉤篳胡拙豪
黠屏營視篆鹿城義叱淮帥萬箱可供丞不可
械隱之軟水威恐人知艖底之呼漭洸駭濤之
詠淋漓豈呂梁之善蹈抑君子之不懼貪泉鑑
其素心泰宇愴其思慮將母來諭遂賦歸來人
曰強仕我曰南陔菽水之甘若飴杞菊之燦如
繡一趺一趨以娛黃耆伯貳安慶萊舞聯翩探
竒選勝山水之間旣痛西河北堂莫逮杖而後

起目瞿心悸損於哀樂蒲龕可栖袖有竒石玩
之解頤對客彈碁不計勝敗冥志寰中逐形物
外灌花旦晚道在忘機茗爐藥裹獨往獨來慕
古嗜書老而彌篤三氏統宗同源不惑能行者
咫奚事說鈴大以歸全緒以長生司命屆期乘
化不爽香篆未消振衣而往嗚呼哀哉人謂先
生起家名法潛心聖真典模先覺白沙尸祀甘
泉揚摧證同辨異會稽之學人謂先生矢志功

初集 卷之七
業白首未華青組自絕囊有圖書室無長物脂
膏不潤姜桂比節人謂先生天性凜肅與人善
言溫於煖玉嫉惡雖嚴虛舟之觸語甫脫口雲
消春燠人謂先生擘畫艱險茅團一束委蛇舒
卷湫隘常寬圭竇非淺落落穆穆深藏偃蹇蚤
歲廢儒獨多著述謂儒爲心百體俱適晚歲息
交不減言笑曳杖衡門聲振林杪四十無子乃
見四孫夢之帝所錫圭命名豹變有時龍文已

現一息萬里追風躡電折肱有訓息踵不衰欣
然自適若嬰未孩孰云長生秘訣肘後坦衷無
猜安和必壽瞻仰音容骨幹竒挺耿介拔俗神
明不泯翩躚長往蓋官絳臺三摩銅荻其在後
來嗚呼哀哉

惠孝竹樓錢公哀誄

嗚呼哀哉不肖鯨之哭吾母也甫五月又哭舅
氏舅氏於吾母稱中表而若同生不肖鯨於兆

元稱中表亦若同生乃斬焉在疚先後如埒天
胡不備降此大割嗚呼哀哉竹林之血欲枯華
屋之號莫罄哀哀罔極廢莪蔚而神凄悠悠我
思詠涓陽而衷愴河冰慘裂誰瞻逝水之停山
木畏佳共有冪雲之戚夫剔微誦穆則載範於
縹緗蓄憤積思則披誠于竹素矧鯨今日悲鬱
所鍾平丘棗肉之哺歛歔難咽龍鄉衣被之却
感慨倍增覩羲馭之易除攀帷轎而易逮規風

流唱和楚些以揚靈松霧烟橫托酸辭而助嘆
含毫孔棘無非眷德之忱見似而瞿總是驚心
之痛其辭曰猗與玄胄雲仍實繁叅知衍祚四
世其昌鳳德五雛和鳴鏘鏘雁行維公紹武誕
祥何以誕祥曰惠與孝夙厲趣操含真稟曜氣
肅而和宇凝而奧耿志不迷師廉維肖佩帶惇
隆逡巡古道賈而儒行市而水心煖言如帛有
諾如金沐翁之稱嘖嘖長者之屐恂恂斥堠戒

嚴海波聿澄洛陽價貴季子囊贏豈逢時而巧
競實鬻義而交傾黃冠叶夢白水尋盟繫庚桑
之爲政兮重趼之至如雲藍縷載葺堂構聿新
贈公曰嘻可以娛賓賓來聚訟片言居間坎坎
蹲蹲咄嗟而辦倚柳櫪兮夷猶聚斑斕兮宵旦
中宵愴惻家督謂何秦法移箸豈伊匪他躬遜
筦鑰以永婆娑推甘佐急益寡哀多和樂且孺
直其然乎朱明給弟弟今朱明風吹滿室椰榆

晦冥吁嗟張秬咨且鄭弘旣夷旣懌鹿鳴侑食
棣萼飛輝鵬搏振翼北榜姓揚南宮譽藉馳山
中之紀綱足千里之樵汲指畫心勞馳驅道逸
分符縮綬左右板輿莫夜胡來惟我自知廉吏
曷歸曰予敝廬歸何不歸式穀似之完玉恐玷
寸銖不私嗚呼哀哉瞰江潭兮翠竹荆阿閣兮
丹楹集續紛紛兮燕笑酒花紅兮燭青藥欄茂兮
春夜縞香芷繁兮秋露零羗朝暉之儵忽長晷

穰之憑升嗚呼哀哉高堂白髮翟翹霞帔欣醜
顏之夕潤嗒萊影之晨稀嗚呼哀哉碗硬朗飭
以居贈公仰視棖楠庶幾音容高楸萎約玄雲
重封嗚呼哀哉青瓊著代白錯廉頑何隨之筭
平劔陳重之金請償愧汗淫淫愧見彥方嗚呼
哀哉麥舟濟石壺發授黔枵腹待果清爨需烟
予糜予榘朝春夜泉施於不報天性自然嗚呼
哀哉芝庭燁燁玉樹英英摩頂而呼顧復同恩

合則比豆離則餉新筐羊迨吉羔雁承賓春寒
鳴熱夜靜書聲嗚呼哀哉楚畹樹蘭鍾山韞璞
帥我以正去雕去琢百行無愆君子有穀嗚呼
哀哉秋香飄兮一枝春明爛兮彩衣修無筭兮
康爵長歲月兮恬熙嗚呼哀哉盼安期於煙嶺
兮揖越人與長桑胡二豎之鞶羈兮紛佗倅而
徬徨歷春秋其代序兮蹇據梧而支牀却金莖
而不御兮靡瓊屑以爲糒雖豐容之漸落兮羌

神爛而色康
遭電影之銷
忽兮入修夜
之茫茫
嗚呼哀哉
駕玉虬兮
翩翩登閬風
兮芊芊恍瑟
栗兮
沍陰悲沈
寥兮廣原嗟
人倫之坎壈
兮扣帝闈而
詎前貴不逮
封兮爵自天
全壽不逮者
兮而有餘年
痛皃皃之靡
控兮迤幽鬱
以流漣
隱幅抑而含
凄兮迸涕零
其棘欒悵白
沙之慘澹兮
遠蕙榭與衡
軒撫遺形之
克紹兮檻衝
蹙之危蹇
閔重扃之黯
黜兮慟鮮民
之多艱

福寧侯存菴錢公誄

存菴錢公自丙戌成進士起家六安守轉刑曹郎尋出知福寧卒於官福人哀思之建祠設祀禱應如響鯨公中表諸甥也又舞象受書追隨累日月沐恩滋渥焉逝波不停既有涓陽之感景暉莫駐益深梁木之悲玄舉戒途丹旌警節宋玉賦大招於楚蒞田客歌蒿里於漢臺俱弟子所托哀也爰述雲徽以佐霜唱其辭曰
瀆

漫大鈞其氣淑清發英吸秀伊惟哲人洛川龍
笛緱嶺鸞笙軒軒眉宇矯矯丰稜天駒迅電滅
影超群旣受六經旁蒐諸子扶踈萬言稗官列
史如珪斯合高山仰止明珠在衣吉光片羽寄
之毫端烟霞滿紙飛仙遨遊其適栩栩公車得
駕籍甚洛陽一息九萬乃阻騰驤歸修友于馬
氏五常曰仲我誨規圓矩方賢書堯唱天府翺
翔曰叔我撫千里齋糒推甘佐乏聿燦奚囊聯

翩上壽以介高堂贈翁不逮母壽而康尋奏南
宮請急還里雛舞甚怡奉檄亦喜蓼州初政轉
魁爲霖慮囚縱枉渭南水清三殘莫蠹五袴匪
矜夜分剪燭邑子執經竒文欣賞多士雲興入
佐棘圍如水如鑑海國異葩揚芬拭艷文氣鬱
都星杓斗建火齊木難覩者色眩鳴琴從頌有
鶴可調偕游赤壁共指丹青縹緲五城與爾逍
遙桑柘影斜春社將散父老分携黎羨麥飯歲

拙政羸咄嗟已辨掩骼糜枵而無咏嘆口碑不
爽秋曹虛席倚閭謂何脂牽孔亟謠詠娥眉施
豐報嗇公曰福寧胡遽非福板輿色養我心則
獲母齡九十兒齒醜顏婆娑遶膝萊絲翩躑嬰
之未孩其樂則天逡巡憚行母曰第往及時樹
勲我固無恙往非繭絲心勞保障槩牘園裾溝
塍視餉戴盆見日樂郊曳杖輿人有頌孰代子
產修夜不暘漫漫胡且嗚呼哀哉山川迢迢鐙

釭耿耿仰而呼母若爲定省俯而呼兒勉旃立
品雅琴三撫濁醪載引青霞鬱竒倏然而暝嗚
呼哀哉新祠巋然顧瞻竊森青芊黝杳如覩其
生酸凝竹淚慘挂棠陰淒風颯瑟玄霧濛溟嗚
呼哀哉公有異姿神標象外天地一指日月衿
帶道味禪心名言其在昔張仲蔚蓬蒿一徑公
得其幽耻交名勝閭然孤坐在易之良昔山陰
雪子猷夜載公得其韵何必見戴任心獨往聊

以自快昔王孝伯樽前有酒公得其逸淋漓百
斗手把離騷何論身後昔鍾山旁意到蹇驢公
得其曠林谷紆徐窮日不返忽恍逃虛昔蘇門
嘯嶺半初聞公得其清欵枿泠泠澄骨內映不
挂一塵嗚呼哀哉屋梁月落石礪流澌寂寥革
櫛惆悵蘿衣素軒靄靄華閣淒其青松迷翠黃
菊霏微遺絃共戢餘軸恍垂民懷茂緒士飮芳
輝蒸嘗弗替金石豈移嗚呼哀哉琴湮廣陵鶴

歸華表魂兮其來北山有栲淑氣宵騰巍我青
顛縹緗儼茲環珍永紹泰岱奚瞻畫傷增悼嗚
呼哀哉

貞慈沈母趙碩人哀誄

夫揚葩述媿禮標累事之詮悼實達冥詞綴歎
心之旨惟文行遠有哀必宜矧雕胡之養莫將
藍田之訓遂邈誠通搯臂而客至誰呼孝感廬
陵而奔號已絕託仁風而永念緬懿範以追恫

是宜輯諸縹緗用彰綏旒吾友沈公和爲貞慈
請誄蓋明發盡傷而千秋永冀者也其辭曰
猗歟碩人誕祥華胄賢良著聲清範艾後旣受
女憲性約而冲咲訾不妄春和內融椎髻相夫
操春恪職婉嫕奉姑以娛冰蘖鷄鳴問寢唱和
同心靡瞻匪父蒞藻必親布縷米塩中外并飭
茂譽烝烝雜佩佐德眉零遠案血淚欲枯舉聲
一號慘裂玄河從游若飴泉臺樂土仰瞻白髮

藐孤孰撫黽勉視息亡而未亡仇氏之織晝割
仲郢之膽夜嘗孤稟母規芳名藉甚裘冶箕弓
久而益振上池丹液以滋未孩保我子孫旗鈴
入懷膝前之誨彌殷戶外之屨日集技以聖而
愈尊福無纖而不積言提其耳櫝楚表慈無愧
泉下爾公允師曰師維何師勤師儉管蒯自珍
作勞靡劬畦蕘不撤展墓必豐邀賓恐後剗薦
作供長者之車跡何多千旄之至止方予嘉令

子之素心徵太君之劇切夢泡非我淨土是飯
晨燈夜篆匪佞匪祈律於禮宗不威而肅子姓
斌斌壺容穆穆嗚呼哀哉之死靡慝冽日嚴霜
式轂惟似爲士也良謚以貞慈象德允臧嗚呼
哀哉秋葉飄彤逝波注碧總帷裁騫丹旌凝嶢
絕琅琅之金聲滅皎皎之王質巷杵不相行岐
隤惻瞻華表兮永康頌京陵兮作則嗚呼哀哉
祭張鄧西先生文

昔在世廟綜尚儒術公方弱冠瑤章金式春華
甫收以閱秋實道可致君法當司直城社憑陵
雷霆下擊孰不愛身鱗批其逆梁獄詞空魏其
訟白所全者大豈伊椒掖星隕謂何天心隤惻
旣脫曾陰尉於揭揚抱嬰護弱拔薤鋤強民膏
無羨歲青有方比遷南署息於菴林六朝故墟
遺音尚存遠宗至聖近淑文成絕學如綫未墜
在人三十橫金身名俱泰纍纍流離士民其瘵

初集
卷之三
何必繪圖挾纊斯慰雪號張公俘稱于尉寧惟
司牧文武吉甫八閩威稜七山樽俎臨勢設竒
談笑却虜功成身退狂夫之阻嗚呼哀哉六經
燦然萬古常新章縫侈談莫吾躬行公本天琢
龍文駒齒理學登壇所至握塵忠衛宮闈勇抗
人主仁起枯骸義落羶鼠印用卽體道固爾爾
嗚呼哀哉白髮番番嘉遜林泉壁立如柱著述
如椽不愧衾影其况四筵一冠數載一裘十年

安分惜福華於綺紈肅若朝典式禮莫愆煖若
布帛贈爾善言行必擇地事必告天晚好瞿曇
豈固逃禪月落萬川處處皆圓嗚呼哀哉鳩杖
方新台文忽失殷楹叶夢孔廡虛席餘壽非年
達尊者德惟之鯨等與公子賁先後遠近合爲
兄弟道義文章亦公臭味昔欽典刑今慟往逝
三觴荐陳佐以蕪味

奠曹太安人

人亦有言樂絲天全漁梁餉鰒竹笋迎船板輿
婆娑萊影翩躚哀我衿人獨罹多艱惟鯨暨元
後先家難愴焉同痛實有周翰存慰勤渠况也
永嘆嗣音稠疊衷情潰洗母病孔亟遍謁長桑
左七右箸進必先嘗昕夕以掖顙祈悅康積疴
成危修夜不暘嗚呼哀哉昊天不傭拊心胡鑿
旣豐其德或嗇之筭夫子孝廉扶搖九萬敬共
罔愆威儀莫選河東母儀京陵婦範慶衍螽斯

恩沾魚貫嗚呼哀哉其胤維何藹藹吉士讀父
之書成母之志母志未成須臾可俟胡不憇遺
奄忽蚤世嗚呼哀哉露晞石火孰爲彭殤憲華
半隕婺宿摧光望形心瞿矧猶子行惟鯨與元
誼切猶子客秋九月聞報惶遽鯨伏幽苦困楨
二豎元嘔竹林屛勉襄事素車載奔居諸奄駛
登堂未展奔訃復滯五內慘怛不知所據春明
初屐觸景驚魂絮酒生芻用以告誠維靈昭格

來止來歎

哭查七弟舜佐文

嗚呼痛哉天乎舜佐迺有此耶憶而之與余別也爲八月十六日也彼時所惜者旬日之離也所虞者三年之淹也儵忽眉睫是耶非耶胡以遽有此千秋長夜之痛嗚呼天乎九月之交四兄之代爲而書也及而之所自手書也把握甚艱點畫非舊余一披視不自知其涕之無從也

然四兄猶以漸致平復報也詎意十月四日而與世辭也六日而訃音至余所也天乎痛哉卽夢寐疑似寧遽有此哉嗚呼而之前余所不能知迺此兩載以來其朝夕食息余所共也其肝膈情性余所悉也此不必上池水之見垣一方也秦鏡之照膽也德操之水鑑也必不至飾說以欺冥冥者也迺余深求而之奄速遽盡而不得也而之自丙申春來就余以至秋塲之逼也

其志欲干霄若一息萬里也晝夜咿吾未嘗不
爲余招搖同好受指惟謹也入秋而嘔血數升
余亟怖其忽嬰此也乃偵之其嬰此已及一載
也傷生之道非一而色爲甚迺而禠身如處子
余能矢其無他也而之所嗜者壯夫義俠骯髒
之志良朋敦好久要之盟左圖右史筆墨之娛
名山大觀濟勝之具此皆曠土所寄致哲人所
鍾情非齷齪瑣尾沉汨殞生之事也忼慷介直

洞識大體獎美如渴採過如焚如此之秉操爽
豁敏給擘畫井整事無鉅細咄嗟而辦如此之
才具意有所極難險必趨宵征夜匡務成厥初
如此之神理有一於此法宜壽理宜壽其展布
究竟而斐然可觀也宜壽儵忽眉睫百一未申
抑鬱悲憤溘焉長逝齋恨九泉遺涕百夫痛哉
傷哉吾舜佐也而所自負者旣不欲令人知卽
知而者朋儕中幾人骨肉中幾人泯泯中夜天

可問乎雖然舜佐有子矣復有兄能子其子矣
余能知舜佐乃知舜佐者又不止余也又復何
言嗚呼悲哉昔 萬曆丁酉十月十九日走哭
舜佐就舫直寫數語告之淒風苦雨淋漓短蓬
嗚呼舜佐知余心矣

祭曹孟陽孝廉

嗚呼四運互催萬化同盡集霰實霜孰旋其柄
惟公之逝扣閣曷罄在昔姬叔開曹之先苗裔

永錫冠蓋蟬聯殿中執法膝下象賢昭茲來許
公其仔肩云何露溘老於孝廉金章孔貴朱綸
未沾摧心華屋齋願重泉抑又聞之公祖父行
杖履耆耄俾壽而減云何橫落君於庚桑彼垣
胡照越人徬徨端木結駟多學而識未殫其施
徒嗇其志懿軌可追芳音奄逝嗚呼哀哉嘉耦
同穴秋以爲期客歲九月爲公先驅何辜藐諸
游遭天憐厄臻百六慟徹連如維鯨元等締交

令子雖獲登堂未遑望履總帷肅瞻忽焉隔世
模範莫承儀光奚駐自春狙秋素車載奔哀我
犖犖觸似驚魂絮酒可告枯魚可焚靈如來格
鑒此芳馨

祭九十五翁留太公文

澗水流青柯峰映碧維公之生星懸南極齒埒
衛懿行推杜伯天和樹惇尊生踵息語戒囂浮
衷葆粹白老而彌勤周旋禡襲偃僂循墻顧瞻

恐失麥舟善施牙籌善息我倉旣盈我庾維億
冷爨需烟枯鱗飲澤鳩杖不携如龍雙屐躍馬
乘風百里晷刻國老上庠賓僎虛席公不數往
恐煩牧伯壽符人瑞名高天錫公之曾孫侍予
咕嗶威鳳文麟扶搖尚戢命以南雍燕然早勒
訓之勿欺勉旃暗室惟予悚聽金玉是式慕公
耆年欽公邵德春仲入衢莽蒼遠隔聞公善飯
而康而色潦黓頻仍項領靡策秋飈荐爽望屐

在卽夙願未償胡嗟倏忽公雖仙遊我心隸惻
維之鯨等洛孫副墨知死知生交情則一鷄絮
告虔齋鏡可及五世蘭孫九齡松栢百載流香
千秋燕翼靈其鑒諸

哭王逸季文

明琅琊茂才逸季以丁酉九月廿九日卒其執
友之居武林者鯨適至自婁捫床信宿執手爲
訣旣阻修途景光易駛越歲戊戌節屆長至乃

復得走素車爲文以告總帷而哭之哀曰憶昔
壬辰定交靈鷲癸巳共席埴篔簹叶奏一言可徵
生平不謬季才如流衆委逝波才亦春華詎爲
季多友道于今薄比織羅吹網欲滿翻履伊何
季曰交難難在持久惟淡乃真千秋不朽凡我
同心永言白首季名如山丘垤影附每一出游
觀者如堵季執麈尾飛談捲霧我獨評季勝在
識度汪洋浩瀚洪浸胥赴鍼芥罔遺河漢無怖

嗤彼蟻蠓沮洳公路嗚呼哀哉白首不負奄忽
黃埃名高未成杳焉夜臺世人望季如登九垓
躡足曳空胡遽陰霾季之處世如長庚星曉曙
方發胡遽宵冥季有深藏世未盡見需之十年
揣摩簡練季所未見化爲露電如世所見抑亦
夢幻嗚呼哀哉金石有盡精神不磨季雖長往
季長往乎荏苒及暮風雨如晦知季深者長懷
無已亦有當年未必知季展轉於今乃更思季

轉而思季良自不易何感何營潛焉出涕嗚呼
哀哉河山邈隔人琴寂寥玄冰冽冽寒風蕭蕭
俯顧嗣子中心怆怆靈其鑒我千里非遙

祭江太夫人

代

維靈婺曜懷光素舒佇德翟禕宜金圭玉質
相攸名族乃嬪華門徽音斗埒錫胤振振華門
代興學憲紹烈左右匡襄化敷西粵懸車非蚤
舞象斯馨九熊佐讀擅譽明經旣翺雲達望雲

思母勛伐雲騫云非我所翩躚萊影潘園板輿
色養欣欣慈顏以舒壺軌示型母儀作傲松栢
巍標蘭蓀晚曜貞襟蕙郁懿問川流重綸誕寵
萬福來求令子名高宸宸側席潢池匪茹經營
著則璽書珍重脂牽以需將母來諗奉以安車
竹笋迎船江魚入饌王陽不驚王遵歎患甫蒞
保定榮譽益宣赤羽飛集青箬旌懸帝憫一方
愴瘁毒痛倚爾長城豈遑將母母曰慎旃移忠
卽孝遄歸含飴曾玄佐笑暉焯載駕妖氛肅清
八方沕穆聖善貤恩太常是銘錫祉隆始金母
酡顏五福兩齒方祈遐笑胡遽宵沉曉月升魄
晞露繁陰嗚呼哀哉上壽淪籌榮施沴兆陟吧
遙酸蜃帷增悼惟其肅馳德里飫欽淑聞篤生
碩甫一代偉人久在帡幪雲間佐吏推厥貽謨
仰宇知庇敬陳椒醕用妥坤軒旨芬燔烈遺徽
載瞻尚饗

祭敬菴許老師

維師道叶衢尊教司木鐸百世芳規千秋正覺
憶自癸巳初來武林爲壇聖水興起如雲智若
淵泉心具明鏡不將不迎有扣則應聽者如夢
忽發大寤勞之來之壽陵學步師粟而溫景星
慶雲師恭而法泰山喬嶽一俯一仰虛往實歸
有顛儼若以振頽靡頽靡至今逝波不返分據
藩籬逃空執響妍嗤不辨號曰大通天下歸仁

孰異孰同師操正印以維一綫毅然立倡誠身
明善匪徒言之實允蹈之屋漏不愧道在於斯
初稱格物繼言艮止誠明一貫如是終始天心
可見至善不孤聖人復起豈其然乎遠紹緇帷
近超新建俎豆鉶香倏而夢奠嗚呼哀哉師奏
南宮甫踰弱冠剗割紛拏鋼成百鍊虞衡飭篋
銓部持衡齟齬謂何志在飡冰秦關峩峩粵嶺
肅肅旣往留樞尋遷授轂所過雅化藉甚榮聞

不務爲惠惠必根心不務爲威威惟德明公廉
寡慾頌自玉音以是覘師庶其生平嗚呼哀
哉哲人萎矣典刑燦然功高翼聖道大經天惟
誠惟敬表裏無愆後有作者同堂比肩維其其
等後先侍側量有淺深飲河則一提耳示事教
思無窮率履不越務滌爾躬亦步亦趨如坐春
風謹緝遺言以偕大道日用飲食皆師之教師
恩罔極報以無報

奠馮開之先生

嗚呼先生遽有是耶大雅遂湮風流頓盡電光
石火一往莫追天乎人乎涕奚從乎憶自訂交
可十八載忘年忘形進之同好楷模在望是因
是宗文章主盟風雅領袖神仙宗伯佛法金湯
名水佳山花晨月夕曰維先生各擅其勝如大
海滙衆流所歸如北斗杓群星所屬如中衢樽
斟酌任意氣和色授頽然栩栩無競無營咸曰

親已過而不有對境採真若佩芳蘭若飲玄醴
久而味長乃真平淡嗚呼先生遽有此耶名滿
寰區文垂金石子將月旦悉成大儒燁燁神彩
千秋不朽乘化歸盡洞無可疑孤山草堂冉冉
來遲先生有靈實棲於此以永蒸嘗是在後死
巋然建像樹之豐碑孰賓孰主香山眉山以質
先生其夙心也鯨方窮經未立寸尺有念莫展
慟懣曷舒以報生平期在異日

祭黃重光文

嗚呼重光遽有是耶憶君弱冠擢穎錢塘蘭芬
蕙藻骨挺眉揚晉江大師古今水鏡首拔君文
金石俱潤旣游成均戊子掄魁洛陽紙貴燁若
雲雷嗣是讀書武林居半簡緣息交空山宵旦
二三同社惟我數人形踈而協意淡而真君如
一諾後先不爽赴友之急萬人必往聚令人歡
別令人悲方嗟倏忽胡遽大歸嗚呼痛哉天道

寧論人生至此慘衷休肝控靡鞫止或死於酒
沉酒濡首君獨霑唇防心守口飲人以和如醇
如酎或死於色妖矛冶戟君獨枯禪天涯孤客
抱經握槩寢處不釋刀錐剗肉而君寡營無戀
無欣衆有皆空叱咤焚和而君致柔藹然可挹
春雅夷猶嗚呼痛哉君不宜死堂有老父豪上
磊珂未覩充鷺甘臙易供莫將孺慕君不宜死
室有賢壺什九在外筦鑰飭井梁案冀鎰胡瞻

胡敬君不宜死膝有令子妙齡能文提攜教誨
誰玉於成鳳毛麟趾君不宜死腹有五車咿唔
達旦將茶据拮力田逢年而止此歟嗚呼痛哉
論君之行儒中處子簡默寧靜幽閑舒與論君
之才文中驍將精悍深沉務窮河漢董惟十年
不窺家園君已廿載忽屯荒烟計君生平攻苦
於文鑱肋擢髓磬曉鐘昏猿梯鷲嶺鬼嘯虫聲
竦斲子影與之爲隣積月積歲苦行苦心徒博

初集
卷之七
一第獨斬其名嗚呼痛哉孤視淒其旅魂慘切
閨砢秋風邊笳夜月行路摧腸哀烏霜咽矧在
交知淚盤氣結

祭顧親母凌碩人

史稱賢媛因事取節偶樹一竒金石不滅竒行
易著庸德罕全露才匪才闇修彌艱於惟碩人
淳備衆媿婉嫵柔嘉持正循禮約結冲和恂恂
損已其尤鉅者在識大體鷄鳴繼總禮隆舅姑

先意承志服勤孔多奉姑日長夙夜匪懈必敬
必誠根中達外天性孺慕旣嫁不衰下氣怡聲
如嬰未孩雍雍春融諧於妯娌埴篲協奏手足
同體方舟泳游以相夫君切劘比玉眉案如賓
鞠育撫摩慈不忘訓一步一趨必納於正外周
族黨下逮減獲減澤旁敷春臺樂國嗚呼哀哉
有才不炫計畫必周是名無非申命用休居德
若錚惟恐有失是名壺儀慶培祥積嗚呼哀哉

綢繆拮据心血欲枯草木之滋樸荒謂何彌留
無怛蓮臺不孤心卽菩提亶其然乎維鯨蘿附
舊姻幸邀新特夙佩芳模時聆令德子女深情
誼關休戚胡不憇遺溘焉窳窳盡傷慘割椒醕
陳詞頌揚維肖靈其鑒之

祭孫貞惠公

樹德務滋約而逾章哀媿揚休比於琳瑯天選
耆艾公德碩蕃大義瑋瑋齊盟不寒一旨可遺

衡泌姬姜友于天顯鼎峙而三鄙哉朱明蔚矣
元方荆株合歡雛舞翺翔有板輿之樂而侈其
同堂慷慨赴急匍匐有喪溝瀆匪諒破橐樸荒
爨無欲清待哺倉箱有黔婁之饑而虞以嗟傷
公家佐訕豈曰饗嘗庚癸罷呼資其津梁弄丸
難解贈劔心償諾不可負人負可忘有魯朱之
誼而恥於名揚籛金不問一經在床人師難遇
重趼裹糒董帷望履絳帳含香嘉客至止倒屣

傾筐文酒流連老而若甘有折筭之訓而令緒
未彰嗚呼哀哉石林峨峨竹箭鏘鏘崇岡曲水
恍忽徜徉修然無怛白雲帝鄉積厚豐施奕世
其昌君子有穀載錫之光生芻一束孺子之將
嗚呼哀哉

林仁宇社兄祭章

嗚呼哲兄遂止此耶士有百行克全者鮮言雖
囂囂夷考不掩獨兄闇修不愧衾影退處罇後

履蹈井井初終無玷久要不忘緩急必赴匍匐
有喪友道凌夷面譽背毀兄吐肝膈成人之美
堂上養高林下一人奉以周旋惟獻其真童齡
孺慕以至白首起敬起孝循墻偃僂自幼離經
細剖真詮先儒衣鉢誨導惓惓臨財分明取予
不爽一與之期風雨必往耻稱任俠實有俠腸
矜寒恤餒挾纊齋糧人有心膂以兄爲托竭忠
畢智曾無宿諾博聞彊記掌故萬言子夜促膝

初集 卷之七 五十一
注如流泉生平苦心恐落人後伏櫪悲鳴良玉
不售明經膺貢未遂懷珍需次博士以慰編芸
胡不憖遺忽焉長夜僅云結局尚艱食蔗嗚呼
哀哉兄有志節不以博名老而彌篤姜桂性成
兄有鬱衷不可明說茹荼自知昏旦如結兄今
已矣天道豈遠多男而孫昌大貴顯惟我朋儕
失所依歸各負竒痛怛惻凄其念鯨抱疴亦已
經歲閉戶避事剝喙俱畏聞訃駭悼起立徬徨

對几而吁四顧如狂病不能趨有慚素車病不
能拜却步躊躇敬陳菲詞奠以止水念兄夙昔
哀何能已靈輒將發飄忽丹旌河山非邈惟有
此心

祭蘿月沈表弟文

人有恒言電光石火水凝爲冰花落成果獨君
之逝倍堪惋痛觸境生悲恍然一夢君貌磊落
豐下康莊宜享多福胡遽溘亡君才倜儻能任

初集
卷之七
五十一
大事小小結構俱有風致君性仁慈成人之美
不避水火扶顛起痿奉母以孝奉兄以恭昆季
交歡杯酒雍容北海開樽平原好客達旦凌晨
移榻整席人有急難袖手旁觀君獨慷慨橐金
可捐人或負義熱心易冷君獨徹底不顧從井
里中曲直片言處分面赤發怒無不欣欣倘受
付托秋毫不爽千金一諾萬人吾往不佞與君
誼稱中表沐君款洽同心合好數年多病避影

適圃惟君繾綣時時過我事無大小必偕商畧
左之右之爰究爰度三日不見必有報章溪頭
喚月花下携觴旣敦久要相期異日倏忽長夜
哀思彌釋君有令子挺若瑯玕置身青衿君心
始安君有愛女已得快婿共勗雲霄不減仲季
念君如生君志未遂不敢負君銘之臥寐清酒
在列語語皆真我哭無聲哭之以文惟君冥護
佑啓後人

祭封君喬石翁文

天道貴嗇過其章光混芒鬱結百昌乃揚維翁
闇然素心樸質悃悃含茹湛於道德蕭疎塵外
山澤之臞沉潛大典列仙之儒不慕奢豪不入
城市抱膝而吟澹泊明志天性孝友善積厥躬
朝斯夕斯養正於蒙何以承前曰維耕讀機杼
書聲奕世有穀柳家三鳳伯叔聯登芸窓督課
胡羨滿羸伯也明經詞壇主壘樹幟司標咸推

海上錢江首蒞嬰赤匡將愷悌君子惠我無彊
蔽芾甘棠六橋花茂真愛勿諼西湖俎豆叔步
芳躅浙溼齊光左右宜之維其有章義方告成
游膺 寵綽懋賞懋官而康而色翁既受 詔
稽首 聖明賁及田間以娛老臣章服一御仍
恬布素冲兮若忘吾返吾故韜精韞璞屯以經
綸發祥未艾久而大亨嗚呼哀哉鶴馭翩翩白
雲青嶂木葉載颺曉霜淒冽翁素善病遂攻養

生細心方脉昌陽竒苓息踵葆神延齡久視偃
僂循墻八十有二克昌厥后俾壽而減諸孫玉
立千仞翱翔翁善詒謀身兼創守天兆方開千
秋不朽維之鯨等奉翁規型夙在瞻企欽崇德
音篤生長公吾邑召杜飲澤含膏皆翁錫祐驟
聆哀訃巷春不相奔告同儕咸切盡傷鏡具可
齋丹誠不爽孺子生芻敬以心往維翁鑒之

祭許年伯母文

玉鍾藍岫芝產銅池馥蓮鱗躍高梧鳳儀發祥
有原物理非邈義成絳帷高閣星皎猗歟太母
委質昌期儲靈婺宿耀景望舒令範巍峩金相
璵潤樂淑禮陶維人無競于歸夫子柱後惠文
蜚聲北朝野掀揭經綸既登九列建牙開府王
事賢勞廟食終古宦遊遍歷司壺恪恭筦籥祇
肅視明聽聰先後匡襄瑋姿克麗纖細罔遺性
安積勩

寵袞鸞綉霞帔翟翹賢書接武麟趾鳳毛鳩
子三飼之若一推旨分甘咸欽邵德篤生仲君
振翮卿霄教隆機杼菽苑名高多孫而賢翩翩
英藻北冥神魚南山霧豹侯鯖在案九醞不空
日賓與祀豐腴雍容白髮恬熙彩衣遶膝玄圃
夜光以娛朝夕七箸正健秉政不衰永祝眉壽
胡遽雲霾七秩持梁五福併集祚胤方隆單厚
多益歸全履順德音不瑕縹緲泉臺大壘之嗟

維之鯨等令嗣金蘭夙欽軌則如珪如璋驟聆
訃音駭悼靡控薄薦庶羞丹誠是貢鮭蔬明水
侑以蕪詞文母亦右儼其來茲

祭朱按君文

代

猗歟碩喆標峻龍門天中誕瑞蓼國儲靈霞煥
颯騰瑤貞鏡鑒表秀干雲廷推邦彥巍峩觀瞻
陟自中臺茂宰趾媿世第祥開聿燦青箱振儀
丹穴藉甚南宮明時聯捷絃歌百里墨綬馳芳

帝心簡在茂績宣揚在後彈文辟邪指佞苑育
仁禽檻除猥獍漕政孔棘千里艤艦獎勤懲惰
庚癸不呼掌衛名高奉命按浙德普春熙威
披霜鉞山陬水滙所至濡膏觀風考俗朝劬夕
勞陳翔尚苛鄭劇過察以德爲輿遂視旣發精
明詳慎炯若神君纖細罔遺拯溺救焚念念愛
民錫茲祉福汜可小康用以報國雍容博大挈
領持綱百務咸理追琢其章道擅匡時體苞緯

物黃輔凝符赤文竝結旣遍東越弭節吳興盡
瘁爰咨熟剖紛紜莫効上池忽嬰竒疾彼蒼弗
憖淵傾嶽圻民之無祿未殫徽猷龍輻乘鷲電
掣風啾七尺謂何祗勤王事不愧簡書光照
百祀知公無怛精白乃心菌椿同盡惟此忠貞
某叨擁麾接公星駕安攘助勦曝冬暘夏玉懣
敷歷方切仰瞻冀來省會聞棘羅賢忽聞遘瘡
我心惶慄曾不數辰訃音遽及汎瀾西顧悚惕

旁皇弗能眡祿益增盡傷敬淪生芻遙申一奠
靈爽有知悅惟歆鑒

同袍公祭楊蘇門封公文

道德之滋國爵屏貴仰紹徽猷昭茲錫類其類
維何以開后昆詩書彌茂鏘濟簪纓猗歟太公
士林師表羔雁盈門蜚聲最蚤久而不遇疑緒
萬端或咎青鳥敗卜新阡公獨毅然受命非地
吾已有子吾志堪寄伯仲鼓篋仲登賢書時甫

弱冠報公力劬旣捷南宮愷悌民牧踧奉 褒
綸錫茲祉福太公膺貢遂辭廣文豸冠戔戔螫
廼以仲伯佩銀章賢孫接武榮問宣馳出佐粵
府高堂雙壽白髮婆婆梁孟如賓朝夕携扶仲
賦歸來五十而慕色咲相依不離跬步考訂古
樂以娛老親伯仲捧觴菜絲續紛嗚呼哀哉公
雖大歸五福已備人世蓬瀛樂餘素位矧公秉
道體受歸全逍遙采真塵務俱捐公析名理飛

譚捲霧送難質疑聽者如堵公好揚善獎借後
來升之九天果列鼎台公喜山水至老不勅洛
社耆英登臨譚讌公具熱腸赴急拯危片言立
剖麥舟可推貞士之操醇儒之識壯夫之氣嬰
兒之色姑射冰雪苞今未孩公有不泯豈遽蒿
萊維之鯨等夙瞻明德或後或先是型是式締
交三世尤藉絃弦西湖法席妙義敷宣佐啓多
方太公之教緇林楷模鱣室則倣邊豆在列清

酒在卮無煩祝敬敬陳蕪詞


祭曹周翰大兄文

憶昔壬辰傾盖湖上聖水靈山徘徊宵旦遂訂
癸巳赴約婁東名園飛閣文酒雍容自此以往
計十八載道契金蘭交深衿帶洞庭春晝燕市
寒雲竹籃共汎肩戶開樽壬子初場卷已首錄
洛浦遺珠聞者躑躅癸丑初夏晤對虎丘遽嬰
竒疾荏苒彌留欲走捫床屏絕客屨音問頗往

初集 卷之五 六十五
莫通一語六年遙憶尚冀元旋聞訃驚悼寢食
俱捐素車謂何養痾畏出復值多冗中夜排惻
嗚呼痛哉兄之生平人人可言肝腸似雪詞藻
如泉四海名耆分行接席一與投好久要無斃
慷慨結納不愧雷陳水火必踐最耻寒盟蕤文
道中實有深致托趣高遠展也文士卧薪嘗膽
羈旅如飴遇而不遇扼腕拊髀自有制科文因
名錄不錄其名文乃華國煌煌二戴誦揚斗山

所不朽者庶幾一班嗚呼痛哉兄有至情黑白
不混兄有苦心昊天可問兄有大美庸劣或憎
兄有小疵賢喆如鏡兄今已矣以貽後昆種德
良茂世武必仍維鯨與兄形骸之外踈節多愆
直詆不怪以道相勵以文相矜增瑕塞回不負
此心憐兄病廢况也永歎重身重名爲二大患
旣慚死訣復愧生芻逗滯徬徨負疚實多兄有
兩賢箕裘克紹麥舟拜惠必有以報歲暮冰沍

北馬怒發敬陳蕪詞靈其儼若



程